

In parfum che savura sco in guaud da schembers

Odurs alpinas inspireschan ina parfumadra

DA CLAUDIA CADRUVI / ANR

■ Bibi Bigler creescha parfums. Sias emprimas invenziuns sa numnan «cembra» e «splendur». L'inspirazion ha ella gi sin l'Alp Sarsura nua ch'ella ha lavurà ina stad sco nursera. Sch'ella sa regorda da quella stad si d'alp en l'Engiadina vegnan endament ad ella pliras savurs. Sco emprima quella da la negla franzlada, ina fluretta cun ina finezza odur. Suenter l'aroma da rascha e dascharina da schembra. Lura la ferm'odur dal traifeogl alpin ch'ella senta adina gia avant ch'ella al vesa. Ma ella sa regorda era co ch'il chaun spizzava sch'el era puspe sa ruldà en la merda, co che la launa umida da las nursas savura e la buatscha da las vatgas che pasculavan enturn sia tegia.

Gia da matta in fin nas

«Jau hai gia da matta adina savurà vi da tut», raquinta Bibi Bigler. «Per exempli vi da cudeschs. Quels hai jau fardà pli fitg che legi. Jau hai era senti il fried da l'aia. In dutg alpin savura. L'En en l'Engiadina ha ina savur frestga, levina, in zichel da glitta.»

Ch'ella veglia in di lavurar cun odurs ha Bigler adina savì. Gia durant ses studi è ella s'occupada en botanica cun plantas savurusas. Suenter l'universitat ha ella fatg la scola da parfumaria a Grasse en Frantscha ed ha lavurà passa diesch onns sco aromatichera per Givaudan en Svizra – fin ch'ins ha reorganisà la firma e stritgà sia plaza. «Igl è stà il job da mes siemis», di Bigler che ha duvrà suenter questa frida ina midada d'aria.

Casualmain ha ella dudì co ch'il chau d'alp da Sarsura ha lamentà che ses nurser saja scappà ed ella ha surpiglià la plaza. Tschintg mais ha ella pertgirà passa traitschient nursas da purs da Zernez e Brail, l'emprim sin las pastgiras da primavaira e lura sin 2000 meters sur mar.



Ella ha in fin nas: Bibi Bigler savura il traifeogl alpin gia ditg avant ch'ella al vesa.

La decisiun si d'alp

Sarsura è bravamain giud via. «Jau hai pu-di dumbrar vi dad in maun ils turists

ch'en passads l'entira stagiu», di Bigler. «Uschia hai jau gi mes ruaus.» Quai è stà d'engrà ad ella. Sper pertgirar nursas ha

ella fotografa bler ed è sa fatschentada cun las savurs alpinas da flurs, schembers, lareschs, tieua. E sco menziunà, i spizzava era da buatscha.

Ma quai n'ha betg disturbà Bigler. Anzi. «Gist aromas recenti èn odurs interesantas che ma fascineschan. En mintga bun parfum datti era substanzas animaticas sco moschus u il fried dal castur.»

Si Sarsura ha Bigler prendi la decisiun da stgaffir ses agens parfums e da fundar sia atgna interpresa.

La frestgezza da dascharina

Ses emprim parfum ha ella numnà «cembra» tenor il num latin dal schember. «Il parfum resplenda la fermezza e vigur da quest bostg che sto tegnair pitg a tuttas temperaturas e forzas», di Bigler. L'odur duai far endament ina spassegiada atras in guaud in bel di da stad.

La parfumadra ha cumbinà ils aromas uschia ch'ins senta l'emprim la nota fre-

stga, sco la frestgezza da dascharina e rascha. Suenter sentan ins la nota greva dal lain. «Cembra» cuntegna sper l'essenza principala dal schember anc laresch, tieu, mimosa, patchouli, guajak e salvia-muscata.

«Splendur» – pli fin e feminin

La seconda creaziun cun il num «splendur» sa basa sin l'odur da la negla franzlada e duai regurdar ins ad ina prada en flur. Igl è ina savur pli fina, pli feminina.

Dapi la stad sco nursera a Sarsura èn passads sis onns. Bigler ha bajegià si ina pitschna fatschenta sco parfumadra. En il fratemps cumpiglia il sortiment tschintg parfums ed ella fa amogna creaziuns individualas apostà tenor gust e giavisch da la clientella. Ses atelier en l'Aathal numna ella «Die Parfum Bar». Tge ch'i dat tut da savurar e fardar là vegn expligtà sin la pagina d'internet ch'ins chatta sut il medem num.

